

西  
巡  
大  
事  
記

西巡大事記卷十一

光緒二十七年十月

目錄

長順奏東三省和議遲早甚有關繫請飭全權大臣從速定約摺十

月初一日

增祺奏俄鐵路監工擬仿吉林辦法在奉天全境開煤鑛訂合同摺

附合同初一日

增祺奏俄人擬在奉天鐵路兩旁開採煤鑛謹繕草約呈覽片

附草

合同初一日

盛宣懷奏請准湖北鐵廠免稅期限再展五年摺初二日

袁世凱奏整頓山東財政以供賠款而圖自強摺初二日

李鴻章奏病勢危篤自知不起口占遺疏仰求聖鑒摺初三日

張之洞致樞垣俄新約仍包藏禍心李相已故尤宜緩訂電初四日

劉坤一聶緝槩奏江蘇賠款數甲他省擬整頓課釐裁軍節餉電十一日

張之洞致鹿傳霖德使因端王已獲罪於大阿哥深致不滿謹以密

陳電十四日

劉坤一等致樞垣各省分攤賠款過鉅請減免四成以紓民力電十七日

胡廷幹致樞垣山東鑛務德領堅請先辦三處請旨遵行電十八日  
長順成勲奏重設哈爾濱鐵路交涉總局增改章程摺二十五日

俞廉三致樞垣賠款湘攤七十萬惟有加稅抵補電二十五日

張之洞致樞垣英使言俄新約萬不可許如未議妥請各國公斷電

二十五日

袁世凱致樞垣中外輿論甚望鑾輿回京電十一月初一日

張之洞致劉坤一盛宣懷免釐加稅十八條分別詳註請主持定斷

電初三日

張之洞致樞垣及外部武昌船關不歸江漢關管請令赫德勿攬辦

電初六日

劉坤一致樞垣及戶部賠款用金或用銀請詳覆電二十四日

軍機處致各省督撫賠款照約每期籌足不能再減三成電二十四日

軍機處致全權大臣據江督電詢賠款用金鎊或還銀請逕覆江督

電二十五日

外部致樞垣吉林邊界韓官越疆生事案據韓廷覆俟商定詳陳電

二十六日

黑龍江將軍薩保奏俄人布置鐵路前後不同並籌辦情形摺  
二十七日

西巡大事記卷十一

黃巖弢夫王彥威輯

男希隱亮編

孫孝章敬立校

光緒二十七年十月初一日

行三十里圃田村

屬鄭州

館四

十里中牟縣駐蹕

長順奏東三省和議遲早甚有關係請飭全權大臣從速定約摺

吉林將軍長順奏爲東三省和議遲早甚有關係籲恩飭催全權王大臣從速定約恭摺仰祈聖鑒事竊惟今日事勢最重和局和議之遲速大局之安危繫焉民生之休戚亦分焉東三省約成復廢中外皆知然俄人於成約時如何情形及廢約後如何情形此惟局中身歷其境者

知之非外人以耳爲目所能默察者也上年俄兵初到吉林其時各國尙未定約俄員佔據地方之意形於辭色俄兵分擾各鄉異常橫暴嗣聞公約已成俄亦有允還三省之信而東省俄兵頗形斂戢卽俄員亦非復前時倨傲迨約成復廢彼族故態復萌一切交涉每多棘手電報局本允交還而把持如故機器局明言騰讓而盤據依然甚至水師營大小船數十隻悉爲佔用而帆錨板索等物搬運一空然此猶是實物或者事定可索還也所難堪者俄員在城人人有強佔豪奪之心俄兵下鄉時時有姦淫擄掠之案俄商貨車絡繹無敢過問稅釐俄佔住屋櫛比隨意侵佔地畝凡遇此等交涉與彼爭論面折之則理屈詞窮每聞退有後言動曰和約未成地方未知誰屬可見俄人恣睢妄爲視和

增祺奏俄  
鐵路監工  
擬仿吉林  
辦法在奉  
天全境開  
採煤礦訂  
合同合

約之定與未定和約一日不定人心一日不安而百姓之困苦顛連莫可告訴者莫不喁喁仰望成約有時且深恐其約不速成遲則生變也合無仰懇天恩飭下全權王大臣將東三省和約從速議定以安民生而維大局幸甚謹奏

盛京將軍增祺奏爲俄鐵路監工擬仿吉林辦法在奉天全境開採煤礦訂立合同恭摺密陳仰祈聖鑒事竊據俄鐵路公司監工吉利時滿函稱奉天界內煤礦仿照吉林現定章程一律辦理愈速愈妙並送到總監工茹格惟志等與吉林將軍所訂合同章程十二條請速爲照覆勿卻各等情前來奴才等一面派員往吉林鈔取合同以便核對一面派委員外郎恩厚赴旅順與之婉商上年復州之瓦房店遼陽之茨爾



山已經開採兩處若再指定一二處尙可通融辦理如以全境訂立合同非敢擅允該監工不以爲然茲者來省會晤復申前議奴才等以前准武廊米薩爾照會欲仿照吉林開鑛辦法曾經據情奏明欽奉諭旨俟東三省大局定後再由全權大臣會同總理各國事務衙門戶部鑛務大臣將所送約章詳細酌核妥議具奏等因欽此自應欽遵辦理且奉天三陵所在風脉攸關亦與吉林情形不同此項合同是否奏經飭議核准現未見有明文似難援以爲據而該監工再四堅請並謂中俄邦交現在和好重敦奉省煤鑛垂涎者多若不早爲訂定合同恐稽時日致有他國攔入難以阻止之慮否則由俄提督派武員來辦日後事轉棘手如慮風脉有關近陵三十里內決不開採等語查煤鑛爲今日

急需該監工之專注於此固亦勢所必然惟從前鐵路章程祇准附近採煤此次送到合同則關涉全省既未敢擅允訂定又不能輒與齟齬致誤大局而該監工迭次催促頗有不容稍緩之勢現由吉林鈔來合同底彙核對亦尙相符奴才等已將一切情形請示全權大臣如何辦理速爲示覆免致貽誤合將該監工送到吉林合同照繕呈覽可否照允所請抑仍飭下全權大臣外務部鑛路總局速爲核議俾有遵循統候聖裁謹奏光緒二十七年十月初一日奉旨著全權大臣外務部妥議具奏單併發

謹將吉林所訂開採煤鑛合同繕單恭呈御覽

一中國東省鐵路公司有權不能阻攔探看開挖吉林省於該路便

益之煤鑛興工開挖應用何法均由鐵路公司酌奪自定

二探看煤苗開挖煤斤鐵路公司有獨擅之權先於他項公司他項人等探看開挖其獨擅之權如煤在鐵路兩旁各三十里之內或華人或洋人或華洋人同辦欲行開採無鐵路公司應允均不得准行鐵路兩旁各三十里外如華人請辦煤斤由將軍主持不必知照鐵路公司如洋人或他項公司或華洋人同辦均須知照鐵路公司俟公司覆稱不用該處始可允准其鐵路兩旁各三十里外如遇煤鑛鐵路公司欲行開挖應先知照吉林將軍或鐵路公司獨辦或中俄合辦

三凡鐵路公司自開之煤左近居民可至審中價買煤斤惟各處情

形不同價值自難一律某處何價均應由哈爾濱鐵路公司酌定開單通示一面知會哈爾濱交涉總局亦行通示華民

四如遇尋得煤苗之處相近或房子三五所或小墳塋不過十墳之基地而其地必須應用則鐵路公司可向地主房主商酌移房移葬等事該價值必須兩相情願哈爾濱交涉局員均當幫助

五開挖鑛洞遇有大塊墳塋須離半里外開採大村莊計十數家往上者亦應於一里外開洞多大商大戶之村鎮當於二里爲限

六凡損壞種植之地鐵路公司照買地處章程之價付給地主如踐踏青苗鐵路公司應以公司與業主彼此酌定價值之數償給

七凡已經開挖而詳考不能合用之地除鐵路公司自置外均當仍

爲墊平或不必墊平則將所毀按照鐵路買地處章程之價給償錢後其地仍歸原業主

八開挖煤鑛興工時如應建造房屋其在應斫木料或在所指地段之中或在界址之外如係民地應償價值均以彼此酌定之數償價如係官地則斫下之樹每株價值應照光緒二十四年五月初七日吉林將軍與咸勃爾定立合同第六條所定之價值給並斫伐木料其餘一切章程亦按該合同所定辦理

九開出之煤每千斤鐵路公司交納吉林銀八分每年分四季交納又每一作工煤洞每年交納山課銀十七兩六錢四分

十凡鐵路公司與各該處華民有纏繞不清商議不合之事均歸哈

增祺奏俄  
人擬在奉  
天鐵路兩  
旁開採煤  
礦開採草  
約呈覽片  
附奉合同

### 爾濱鐵路交涉總局查覈定議

十一以上章程係專爲鐵路公司自開之鑛而定其華人自辦之鑛無論新舊無論何處仍歸中國舊章辦理鐵路公司毫無干預

十二以上合同應繕兩分吉林將軍長順與全權代辦達聶爾畫押畢仍送總監工茹格惟志副監工依格納齊烏斯畫押然後吉林將軍與總監工各存查一分

增祺片 再前據鐵路監工吉利時滿函稱奉天界內煤鑛擬仿照吉林現定合同一律辦理請速照覆奴才等以事關全省煤鑛未敢擅允當即函達全權大臣核示乃該監工愈催愈緊奴才等均以未奉朝旨爲辭彼皆置若罔聞又以鐵路之事相迫竟有不容稍緩之勢窺其意

之所在仍屬專注全省煤鑛爲獨擅利權之計查吉林煤鑛合同前派員往鈔底案尙屬相符黑龍江興安嶺一帶金鑛爲俄所迫亦經訂立合同現已請旨辦理吉江兩省旣已定立合同則該監工之迫爲此請亦勢所必然奴才等再四籌思現在三省交收尙未定議若一味堅阻於大局亦有窒礙且該監工前有武員來辦之語雖屬恫喝然恐一經決裂枝節橫生辦理更形棘手現擬就吉林合同量爲酌改冀免侵及陵寢仍將此草約與之商明俟奏奉諭旨允行或飭全權大臣議准再爲畫押如未允准即作廢紙輾轉間或可接到全權大臣示覆設此時該監工仍非畫押不可亦祇得從權簽押仍不蓋印留此退步以便候旨遵行謹將擬改合同底藁繕呈御覽謹奏光緒二十七年十月初一

日奉硃批著全權大臣外務部妥議具奏單併發

謹將擬改合同底蘖繕單恭呈御覽

東省鐵路公司監工吉利時滿擬在奉天鐵路兩旁開採煤鑛故於  
華歷二十七年 月 日與欽命盛京將軍增祺府尹玉恒面議仿  
照總監工茹格惟志特令全權代辦達聶爾與吉林將軍長順改定  
考查煤苗開採煤斤合同先列草約各款如下

一中國東省鐵路公司採看開挖奉天省於該路便益之煤鑛至興  
工開挖應用何法均由鐵路公司酌奪自定

二採看煤苗開挖煤斤鐵路公司有獨擅之權先於他項公司他項  
人等採看開挖其獨擅之權如煤在鐵路兩旁各三十里之內或華



人或洋人或華洋人合辦欲行開採無鐵路公司應允概不准行鐵路兩旁各三十里外如華人請辦煤斤由將軍府尹主持不必知照鐵路公司如洋人或他項公司或華洋同辦均須知照鐵路公司俟公司覆稱不用該處始可允准其鐵路兩旁各三十里外如遇煤鑛鐵路公司欲行開挖應先知照盛京將軍府尹或鐵路公司獨辦或中俄合辦

三凡鐵路公司自開之煤左近居民可以價買惟價值由公司酌定知會奉天交涉總局一面通示華民

四如遇尋得煤苗之處相近或小房子或小墳塋而其地必須應用由公司自向業主商酌給價交涉局員亦當幫助

五開挖鑛洞遇有大塊墳塋須離半里以外開採或大村莊於一里外開採多大商大戶之村鎮以二里爲限

六凡損壞種植之地公司照買地處章程之價付給如踐壞青苗公司應與業主酌定價值償給

七凡公司用價購買之地已經開挖如詳考不能合用除公司自置外仍爲墊平退交原業主原業主亦將原價交還如所毀之地未經墊平則此地亦退交原業主惟原業主不必繳還原地價以爲墊平之費

八開挖煤鑛興工時如應建造房屋其應斫木料或在所指地段之中或在界址之外如係民地應償價值均以彼此酌定之數償價如

係官地則斫下之樹之價知會將軍府尹派員勘估給值

九開出之煤每千斤公司交奉天銀八分每一作工煤洞每年交納山課銀十七兩六錢四分

十鐵路公司與華民有轆轤不清之事均歸奉天交涉總局核辦

十一以上章程專爲公司自開之鑛而設其華人自辦之鑛均照中國舊章辦理與鐵路公司無涉

十二無論華人俄人跣定煤鑛如與陵寢龍脈及國家一切禁地有礙者一概不得開採如於陵寢龍脈無礙亦不得在陵寢附近三十里之內開採即在三十里外採煤亦不得開至三十里以內之地以上所擬草約十二條分繕二分將軍府尹與鐵路監工各存一分

盛宣懷奏  
請准湖北  
鐵廠免稅  
期限再展  
五年摺

俟奏明或奉旨允准或飭交中國政府全權大臣議准後再分繕合  
同畫押蓋印開辦倘未經議准所有以上條約均作廢紙合併訂明

初二日 行三十里韓莊

屬祥符縣

四十里開封府城駐蹕

會辦商務大臣盛宣懷等奏爲湖北鐵工廠免稅期限請准再展五年  
以維鐵政事竊查光緒二十二年九月間以湖北鐵廠官本重大煉鐵  
與製造不同經湖廣總督奏請優免稅釐奉旨依議欽此溯自光緒二  
十二年十二月起扣至二十七年十一月五年期滿據總辦鐵廠委員  
等呈報前來臣等查鐵廠利源所在以蘆漢鋼軌爲大宗自去歲京津  
匪亂以來路燬工停數十萬銷路驟斷挹注無資危機迭出徒以廠有  
國家鉅本且關繫於製造鎗礮軍火者甚爲緊要勢不能若民間廠局

散匠停爐即不得不竭力支撐借貸挪移保目前以作將來之備舊虧未已新欠旋增臣宣懷督飭經管各員董鎮定從容支拄於絕續之交實已備殫心力目下北方大定幹路興工方冀鋼軌銷數漸增出入可資津補而又屆免稅限滿之期如一切料件即令照章完納稅釐力所不任不得不籲懇朝廷將免稅期限再展五年以恤廠艱而維鐵政且大冶鐵鑛材富質良爲長江一帶鑛產之精華東西各國所共注目苟國家財力有餘尙當增籌鉅款盡力擴充則此已成之局自宜加意保護保護之道無他輕其成本暢其銷路而已況新約禁運軍火入口將來自行製造需用鋼鐵至多舍鐵廠無所取之尤宜加意栽培可否請旨飭下該部再予免稅五年仍符二十二年原奏十年之數出自逾格

世凱奏  
整頓山東  
財政以供  
賠款而圖  
自強摺

鴻慈謹奏光緒二十七年十月初二日奉旨著照所請該部知道

山東巡撫袁世凱奏爲整頓山東財政以供賠款而圖自強恭摺具陳  
仰祈聖鑒事竊本年八月二十九日接准行在戶部咨開本部具奏新  
定賠款數鉅期迫亟宜合力通籌分派攤還一摺光緒二十七年八月  
十六日具奏奉旨依議欽此欽遵查原奏內稱每年派山東省九十萬  
兩當即就東省財賦通盤核計凡可興利除弊之處悉心籌度冀得補  
苴第當公私匱乏之際竭澤旣虞非計開源又難剋期惟有先從力去  
浮糜嚴杜中飽入手現計整飭鹽務歲可增銀二十八萬九萬兩清理漕  
費歲可提銀三十萬兩地丁收錢歲可提贏餘銀五十餘萬兩三項共  
計一百一十萬兩之數除付戶部原奏攤派九十萬兩外約尙可餘二

十萬兩惟該三項均視年成豐歉爲盈絀如遇水旱偏災便不能如數  
措解而洋債勢難從緩勢不能不預爲之備擬將所餘二十萬兩均撥  
司庫另款存儲無論何項要需概不准挪移支撥專爲備荒作抵之用  
庶歲事雖有荒歉總可依限解償至鹽務一項仍由秋季起增向來下  
半年銷數較爲減色本年僅可得十萬兩左右擬存儲聽候部撥其本  
年節提漕費三十萬兩須至明春始可湊齊擬以此項儲作明年償款  
之需因甲年漕費總須在乙年春季湊齊不及甲年應償之限不得不  
預先儲備爲未雨綢繆之計地丁錢糧亦自下忙爲始本年可得二十  
餘萬兩擬以此項撥作本省陳家窩王楊家兩處堵塞決河不敷工款  
及被災各屬賑撫之費自明年起再將鹽務增款及地丁錢餘專作爲

抵償洋債之款其南北運河所節經費均可得十萬兩本年已奏撥河工明年可另儲候撥統共籌節各款計有一百二十萬兩上年曾籌提四十萬作爲練兵月餉此兩年內已籌一百六十萬兩之多以山東瘠苦省分驟增鉅款不免漸形拮据則戶部原奏房捐糧捐自可從緩議辦以紓民力而示體恤鹽斤加價一節東省自二十一年起迭經加價加課爲數已不下四文現復督同運司籌定辦法由臣另摺具奏似可免其更張至裁汰防綠各營餉項歲計無多擬遵照政務處來咨留充辦理巡警軍費用而土藥茶糖菸酒五項東省不產茶糖加抽三成計亦甚細惟土藥菸酒三項尙可設法已飭籌款局司道切實經理可望日有起色抑臣之愚慮更有不能已於言者近年新舊賠款總計每歲



所出不下四千數百萬合通國地丁之力方足勉敷應付嗣後貧弱自  
不待言然如僅籌償債不圖自強恐悉索者未盈而覬覦者踵至爲今  
之計償債固屬急務自強尤爲要圖必須統顧兼籌始可勉爲善國況  
東省強鄰逼處鐵路縱橫久已受制於人不啻據我堂奧尤當力籌防  
範隱杜侵凌凡營伍器械學校商務製造各端在在均關緊要亟須因  
勢利導逐漸振興然無米爲炊勢必一無所濟擬除籌一百二十萬兩  
外仍將百貨釐金稅契土藥菸酒各項雜稅及各種積弊認真整頓釐  
剔核計所入除每年釐金項下向解之固本兵餉銀六萬兩土藥項下  
撥作武衛右軍先鋒月餉銀六萬兩仍照原案如數解支外下餘之款  
均留東省以備辦理各項要政庶外足以應鉅債內足以圖自強不至

李鴻章奏  
病勢危篤  
自知不起  
口占遺疏  
仰求聖鑒  
摺

益貧益弱不可收拾大凡創行一政整頓一事其繁難姑不必慮而甚便於國計必甚不便於憲國之人不便者多斯阻撓者衆以臣受恩深重圖報情殷斷不敢稍涉瞻徇總期於公家之利知無不爲於應辦之事實求其是此則所以報高厚之恩者耳謹奏光緒二十七年十月初二日奉硃批籌辦極有條理具見公忠殊堪嘉尙各省皆能如此認真何難妥籌鉅款該部知道

### 初二日 駐蹕開封府城

全權大臣直隸總督李鴻章奏爲臣病垂危自知不起口占遺疏仰求聖鑒事竊臣體氣素健向能耐勞服官四十餘年未嘗因病請假前在馬關受傷流血過久遂成眩暈去夏冒暑北上復患泄瀉元氣大傷入

都後又以事機不順朝夕焦思往往澈夜不眠胃納日減觸發舊疾時作時止迭蒙聖慈垂詢特賞假期慰諭周詳感極零涕和約幸得竣事俄約仍無定期上貽宵旰之憂臣未終心事每一念及憂灼五中本月十九夜忽咯血盈餘數日之間遂至沉篤羣醫束手知難久延謹口占遺疏授臣子經述恭校寫成固封以俟伏念臣受知最早蒙恩最深每念時局艱危不敢自稱衰病惟冀稍延餘息重覩中興實志以終殁身難瞑現值京師初復鑾輅未歸和議新成東事尙棘根本至計處處可虞竊念多難興邦殷憂啟聖伏讀迭次諭旨舉行新政力圖自強慶親王等皆臣久經共事之人此次復同更患難定能一心總力冀贊訏謨臣在九原庶無遺憾至臣子孫皆受國厚恩惟有勵其守身讀書勉圖

張之洞致  
樞垣俄新  
約仍包藏  
禍心李相  
已故尤宜  
緩訂電

報効屬續在即瞻望無時長辭聖明無任依戀之至謹叩謝天恩伏乞  
皇太后皇上聖鑒謹奏光緒二十七年十月初三日

### 初四日 駐蹕開封府城

張之洞電信 兩月以來連接李使轉日本外部各電力勸勿遽允俄  
約事日外部皆分致江鄂因江督均已電奏故未瀆陳現在李相已故  
俄約尤宜從緩查日本覆電要義在中國若允緩俄約必有好結局若  
欲定俄約務先商日本數語李相所電俄人新擬數條僅止不提鐵路  
造至關內而已其於侵我主權祇准設巡捕兵不准設礮兵及獨佔鑛  
路工商一切利益絲毫未改退還年限亦甚含糊閃爍包藏禍心愚我  
實甚日本如此助力我若倉猝定約日本必怒首先效尤英德意各國

繼之不惟遼不能復大局危矣務望朝廷從緩再議熟思審處詳考各國情形以俟機會不勝悚切請代奏之洞東

初五日 駐蹕開封府城

上諭刑部尙書着張伯熙調補葛寶華補授工部尙書

初六日 駐蹕開封府城

上諭奉懿旨奕劻着加恩在紫禁城內乘坐二人肩輿

初七日 駐蹕開封府城

奉旨朕欽奉慈禧端佑康頤昭豫莊誠壽恭欽獻崇熙皇太后懿旨周馥奏督臣因病出缺代遞遺疏一摺大學士直隸總督李鴻章以儒臣起家軍旅早膺疆寄晉贊綸扉輔佐中興削平大難嗣在北洋三十餘

年辦理交涉悉協機宜上年京師之變事機萬緊該大學士忠誠堅忍力任其難宗社復安朝野攸賴本年七月間因病迭經降旨慰問該大學士仍力疾從公未敢休息忠靖之忱老而彌篤方冀調理就痊長資倚任乃驟患咯血遽致不起當茲時局艱難失此柱石重臣披覽遺章曷勝愴慟前已加恩賜卹予謚文忠追贈太傅晉封一等侯爵入祀賢良祠著再賞銀五千兩治喪由戶部給發原籍及立功省分著建立專祠並將生平事功政績宣付國史館立傳靈柩回籍時沿途地方官妥爲照料任內一切處分悉予開復應得卹典該衙門察例具奏伊子刑部員外郎李經述著賞給四品京堂承襲一等侯爵毋庸帶領引見工部員外郎李經邁著以四五品京堂用記名道李經方著俟服闋後以

道員遇缺簡放伊孫戶部員外郎李國杰著以郎中即補李國燕李國煦均著以員外郎分部行走李國熊李國燾均著賞給舉人准其一體會試用示篤念盡臣有加無已之至意

初八日 駐蹕開封府城

初九日 駐蹕開封府城

初十日 駐蹕開封府城

皇太后萬壽百官皆蟒袍補褂行禮

十一日 駐蹕開封府城

劉坤一聶緝槩電奏 江蘇奉派新賠款二百五十萬數甲他省款鉅期迫坤一等悉心籌畫近年用款浩繁實有萬難支柱之勢不得不上

劉坤一聶  
緝槩奏江  
蘇賠款數  
甲他省擬

整頓課釐  
裁軍節餉  
電

達宸聽查舊借洋款派還之項以蘇省爲最多又有瑞記洋款現值本息兼還每年不下九十萬搜羅應付已同竭澤自鹽貨釐金抵借之後隸江省者三百餘萬雖經戶部照數撥補而各省欠解累累上年竟欠至一百餘萬之多咨部改撥則仍令該省自籌咨催速解又復以仍請改撥展轉推延迄無實際今年解到更屬寥寥江南軍餉從何撥放今又驟措大賠款各省以全力籌解尙苦不能足數以後何能再解協餉是江南奉部撥補款項更屬有名無實江南既奉派新賠款二百五十萬又須籌借撥補解款之不足統計非每年增籌四百萬洋款必致譁潰坤一何能當此重咎至於議行新政在在需款猶不在此數內現在籌款之策如鹽斤加價甫經開辦各省已起而相爭遵照部議持平



辦法每斤分給二文照此定案江南又少一半進款此外如規復錢價酌提漕費整頓課釐以及房捐膏捐凡可行者無不酌量議辦誠以宵旰焦勞關係大局之事坤一等不敢避嫌怨然總計尙不滿二百萬數未及半憂心如焚再四思維惟有將張春發陳澤霖兩軍裁改後節省餉需分儲江寧江蘇兩藩庫雖歲有豐歉釐有旺絀常關歸稅司後局勢變遷不能解足原數然合計除供支張陳兩軍外總可得數十萬金以之留抵賠款蘇省略得喘息其餘不敷之百餘萬再行設法爲得尺得寸之計恭請聖裁謹奏

十二日

駐蹕開封府城

十三日

駐蹕開封府城

張之洞致  
鹿傳霖傳  
使因端王  
已獲罪於  
大阿哥深  
致不滿謹  
以密陳電

## 十四日 駐蹕開封府城

張之洞致鹿傳霖電信 九月內德穆使自京來鄂晤談擇密室屏人  
密語問曰大阿哥之本生父端王經各國加以重罪不知大阿哥將來  
究竟如何言語甚多大率深不悅而已此事甚難對當即答曰此大事  
臣下不敢知但聞皇太后近來因大阿哥不好學深不喜大阿哥而已  
本擬即行密陳因近日道路傳聞朝廷於此事將有舉動則爲外臣者  
於此等事自不宜妄言且上意已定更不必再言但恐朝廷或詢問樞  
廷諸公疆臣中有所聞否若不將德穆使此語奉達朝廷萬一責疆臣  
以有聞不告則更不能當此咎故謹以密陳如朝廷問及則請以此語  
轉奏如不問則不必矣敢請密告榮相懇其妥酌至禱洞鹽

# 十五日 駐蹕開封府城

上諭政務處奏請飭各省速辦學堂等語建學儲才實爲當今急務前經諭令各直省設立學堂責成該督撫切實通籌舉辦惟通省學堂同時並舉財力或有不逮如必待各府廳州縣中小學堂籌定始行開辦轉至觀望遲延查袁世凱所奏山東學堂事宜及試辦章程擬先於省城建立學堂一區先從備齋正齋入手俾初學易於造就先有師資再行次第推廣其教規課程參酌中西而諄諄於明倫理循禮法尤得成德達材本末兼賅之道著政務處即將該署督原奏並單開章程遍行各省立即仿照舉辦毋許宕延其如何選舉鼓勵之處著仍遵前旨由政務處會同禮部速行妥議具奏

劉坤一等  
致電各省  
分攤賠款  
過鉅請  
減免四成  
以紓民力

十六日 駐蹕開封府城

十七日 駐蹕開封府城

劉坤一等電信 各省分派賠款爲數過鉅籌措萬難方今民生困窮商業凋敝經去年之變各省商民元氣大傷種種籌款之法歷年皆經辦過久已竭澤而漁若再痛加搜括民力既不能堪賠款必致貽誤且沿江沿海五省鹽釐貨釐久已抵還舊案洋債撥補大半無著近年加撥各款多已有名無實無法籌解而自去年以來南北各省賠開教之款多者二三百萬少者數十萬即不聞教省分攤派直隸教案賠款亦二三十萬十數萬此又出於各項餉需之外現自新案賠款經全權定議後各省攤派更苦無法且即照所擬奏明籌捐之數將來亦恐難收

足間有議加貨釐者乃無聊之極思竊恐驅魚驅爵徒歸洋旗子口收數轉不能多若按糧捐輸少則無益多則必然扞格房捐雖有辦者亦不能多此外各種籌款之法無一易辦者無論如何籌加籌捐無非取之於民當此民窮財盡之時若再儘力搜括以供賠款必至內怨苛政外憤洋人爲患不堪設想然賠款豈能失信竊擬一稍紓民力之法蓋各省賠款數鉅籌足固難而尤以明年上半年一期爲更難籌款甫經試辦尙無端緒期限已迫必然貽誤查十月初一日起洋貨加辦值百抽五一條據上年二月總署咨赫德條款每年可加增三百萬以內即按九成核算亦可歲增二百七十萬向來免稅洋貨亦按值百抽五納稅一條據稅司賀璧理現開節略照二十四年免稅各物計每年可收

三十二萬據盛宣懷條議爲數更多常關歸稅司代收一條據德國穆使言津海一關稅司代收每年可多三十萬準此類推除粵海關不歸稅司就赫德初次指定之十四關及外務部咨赫德二次添指之十關局合之天津關共二十五關局每年必可多收一百五十萬折漕一事現任漕督張人駿奏請以二兩折放九十餘萬石令江浙購米五十萬石備用折解折放者每石省運費一兩三四錢每年可省一百三十餘萬即照倉場文令江浙運米一百萬石每年亦可省約七十萬合之山東折漕省出運費約二十萬省挑挖運河等費約十萬南北各省折漕向計總可省百萬以上四項通計共得五百五十萬就每年賠款一千八百萬之數核計已得三成有奇伏思洋貨值百抽五免稅之貨完稅

常關歸稅司兼辦全漕改折四項乃各國公使及全權所指定者本議明專爲賠款而設戶部咨文亦有關稅增數專爲賠款各省攤數尙可酌減之語具徵體恤伏懇天恩俯念民生困苦鉅款難籌准將各省賠款准免三成即將上項所指加增裁省之款湊足各省上半年止解二成下半年解五成以紓民力而免貽誤此減贖七成自必如期籌解惟所指抵湊三成之款必須明年十一月方能收齊而明年上半年五月還期萬不能誤擬請飭下戶部盛宣懷及上海道向外國銀行如滙豐德華之類商借五百四十萬約定明年五月半交銀一半歸還酌給利息能祇借八個月尤善國家祇借此數並不爲難年限旣少即利息略重亦屬有限俟明年十二月間核計所指增收裁省各款實得若干如

足敷三成及息銀即請於光緒二十九年令各省以後即照此七成之數籌解如洋常兩關於抵足三成外能再多收一百八十萬各省卽再減一成如不敷三成及息銀則請由各省照數分攤解部補還限後年二月解足蓋減少三成商民固感皇仁且展至下半年始解鉅款亦可從容妥籌免致操切生事此外西北各省尤爲瘠苦情形亦必相同伏乞代奏請旨施行劉坤一張之洞奎俊許應騷陶模魏光燾聶緝槩王之春李興銳任道鎔德壽端方俞廉三岑春煊丁振鐸李經羲鄧華熙盛宣懷

軍機處致劉坤一張之洞等電信 諫電已進呈所籌將戶部分派各省賠款減免三成及明年五月還期如不足數商借洋款各節奉旨均



可准行仍希貴督電知各督撫暨盛京卿上海道合力通籌來年務足七成之數分別隨時具奏辦理

十八日 駐蹕開封府城

胡廷幹致  
樞垣山東  
鑛務總辦  
堅請先辦  
三處請旨  
遵行電

署魯撫胡廷幹電信 頃德國連領事來省商辦沂州五處鑛務一案  
袁撫未及辦該領事來省語多要挾並不查照總署知照克使原議列  
款三條一不允派華總辦二報効不允值百抽二十五僅允抽五三於  
未定章程前須先辦三處一由沂水繞至沂州向東連海二在沂水附  
近一百二十里內第三處在燕臺圖二百五十里內以二十五年八月  
克使函致總署之日即作爲允准之期故須先辦三處云云屢次駁詰  
堅不答應此案未經允准並無簽字合同章程何能遽請先辦三處既

係商人呈請開辦與國家交涉不同又何能不照路礦局章程辦理而彼再來照會必欲開辦磋商無法請旨遵行廷幹叩諫

### 十九日 駐蹕開封府城

軍機處覆胡廷幹電信 諫電悉袁升撫甫行德領事即來要挾礦務不照前議章程辦理殊不知山東交涉事宜向由北洋大臣兼管應即電袁升撫妥籌因應並候外務部核籌彼所稱強行自辦係恫喝慣技況穆使照會原有會商之語領事何能不遵儘可以此駁詰倘滋生事端是彼不遵穆使辦法所致不能謂我保護不力也仍希妥酌辦理爲要樞

### 二十日 駐蹕開封府城

上諭朕欽奉懿旨已革端郡王載漪之子溥儀前經降旨立爲大阿哥承繼穆宗毅皇帝爲嗣宣諭中外慨自上年拳匪之變肇釁列邦以致廟社震驚乘輿播越推究變端載漪實爲禍首得罪列祖列宗旣經嚴譴其子豈宜膺儲位之重溥儀亦自知惕息惴恐籲懇廢黜自應更正前命溥儀著撤去大阿哥名號並即出宮加恩賞給入八分公銜俸毋庸當差至承嗣穆皇帝一節關係甚重應俟選擇元良再降懿旨以延統緒用昭慎重將此通諭知之

二十一日 駐蹕開封府城

上諭派奕劻等會同前步軍統領看視紫禁城值班兵丁獎賞

二十二日 駐蹕開封府城

長順成勳  
奏重設哈  
爾濱鐵路  
交涉總局  
增改章程  
摺

## 二十三日 駐蹕開封府城

上諭安徽巡撫著聶緝渠調補恩壽著補授江蘇巡撫陳夔龍著署理  
漕運總督前皖撫王之春開缺候簡

## 二十四日 駐蹕開封府城

上諭明年會試著展至癸卯舉行順天鄉試於明年八月間借河南貢  
院舉行河南本省鄉試著於十月舉行次年會試仍就河南貢院辦理

## 二十五日 駐蹕開封府城

吉林將軍長順副都統成勳奏爲派員重設哈爾濱鐵路交涉總局並  
添設分局增改章程恭摺仰祈聖鑒事竊查吉林省北哈爾濱爲東省  
鐵路總匯之區交涉殷繁光緒二十五年前將軍延茂奏設交涉總局

由省派員專辦東省鐵路交涉事宜從俄請也上年邊蒙驟開局員回省局房即付之一炬現在路工一律興修該處繁盛過昔華俄各商民趨之若鶩交涉愈多是以俄總副監工茹格惟志等前遣其代辦達聶爾來省仍以設局爲請並擬有合同十一條經臣等逐加斟酌凡有窒礙之處均爲刪改而該代辦則以不敢擅專爲詞又風聞哈爾濱附近公司一帶地畝均被侵佔當派署吉林分巡道文韞帶印前往哈爾濱察看情形並與副總監工會商一切業於本年五月間附片陳明在案茲文韞於八月初六日由哈回省將就近察看情形並反覆磋商各事稟覆覈奪前來奴才等查哈爾濱總車站原佔地方寬八里廣四里約計三十二方里前已咨呈總署有案嗣該站挖濠又拓佔不少現時俄

總副監工復欲佔拓地面繪圖劃分界線約計拓廣至周圍五十餘里經文韞再三辨駁未允退讓設局一事議定於哈爾濱仍設總局各段監工處各派專員設立分局均歸總局節制所有局中經費仍照舊章由該公司籌給津貼惟前次總局專管鐵路交涉此次總監工等增改章程凡正關涉鐵路及連涉鐵路之命盜雜案及一切交涉事宜無論距哈爾濱遠近均須歸局經理免致移交地方官會辦轉多遲誤奴才等察核所定章程尙無窒礙已允其從權辦理第局事如是繁重非有明敏幹練之員不克勝任向來派委該局總會辦必選熟悉交涉之員現既重修舊好局員尤宜慎選故前次延茂所定合同內載有哈局委派總會辦及更調總會辦預先向總監工斟酌再由將軍主持派定等

語此次議派總會辦與總監工函商往返數四始定以文韞爲總辦知州方朗爲會辦查文韞守經達權深識體要方朗才識明敏曉暢事機以之分派該局總會辦差使實爲中俄翕服或能因應咸宜文韞現署吉林分巡道未克常川到彼經理所有總辦事宜卽令方朗就近代辦遇有要事隨時飭令文韞前往會商以昭鄭重目下佔地一節最關緊要應俟方朗到彼面商妥協再立合同以杜將來增佔其局中一切經費並俟議定報明立案除將前繳關防札發方朗帶往設局開用並將合同咨呈軍機處外務部查照外所有重設添設總分局並增改章程緣由理合恭摺具陳伏乞皇太后皇上聖鑒謹奏

謹將增改哈爾濱交涉總局章程繕單恭呈御覽

增改

光緒二十五年四月二十二日  
俄歷一千八百九十九年五月十九日

吉林將軍延茂定立設立哈爾

濱鐵路交涉總局章程

光緒二十七年六月初三日  
俄歷一千九百零一年七月初五日

全權代辦達聶

爾奉中國東省鐵路公司總監工茹格惟志派委與吉林將軍長順  
增改酌定各條如左

第一條 在吉林哈爾濱地方設立鐵路交涉總局一處派專任局  
員數員專駐哈爾濱鐵路各段監工處亦各派專員各段之專員均  
歸哈爾濱總局節制

第二條 設立該局專爲定辦吉林省所有各事件或正關涉鐵路  
公司或連涉鐵路公司再或正關涉或連涉東省鐵路作工之人並  
承辦各種料件之各包攬人各匠人又所有居住鐵路界內或暫住



或久住之華人如買賣人手藝人或服役或閒居諸色人等雖不涉鐵路差使亦均歸哈爾濱總局定斷辦理現在各段皆有交涉官員是哈總局可以派令該員遇有不甚違背中國律例及鐵路章程之事就近與各該段監工商議辦理而遇大項事件甚違中國律例及鐵路章程如命案聚衆犯上強姦竊盜竊盜逾吉林錢三百吊以及貪贓等事並類此之案無論犯事距哈遠近均應歸哈局查究定辦倘遇出事地方之交涉局不能定案之輕重則應會同該處鐵路監工寫簡明信函請示哈局歸何處定案倘遇事件緊急則請由該段監工轉電哈局請示倘遇重大事件尤須隨時從速電陳哈總局以上各節凡在吉林地面滿蒙旗漢均應一體遵照

第三條 凡一切事件與第二條所載之事相符或該衙門或各官員以前起首經辦者應從速行知哈爾濱總局轉知總監工擬定應否在該總局按擬定辦或交該處就近之鐵路工段之交涉官查勘定辦

第四條 嗣後凡各衙門各官員新有呈控呈請各件與第二條所載之事相關者應卽送交哈爾濱總局核辦

第五條 凡呈控呈請在第二條所載之事統歸哈爾濱總局官員會同東省鐵路公司總監工或全權代理人查訊再凡一切事件應如何辦定亦同總監工或代理人彼此和衷辦理

第六條 在第二條內所載各項中國人經哈總局按理擬定後始

行辦伊之罪或哈總局自行辦罪或交原出事地方辦罪倘應發遣之人可以請該處就近之地方官照哈總局所定發遣凡犯事華人或未經定案應行押候或已定坐監之罪應在交涉總局監造監獄並看押房以便監押此項華人

第七條 一切極重事件凡應斬決及流罪以上之人及哈爾濱總局官員與總監工有意見不同之處均歸將軍按局員稟請並總監工照會核辦其餘事件即使甚關重要均應由總會辦與總監工或總監工之代辦商酌定斷隨時發落一面稟知將軍查照並一面移知吉林交涉總局備案

第八條 哈局官員兵勇均歸將軍派委至派委總會辦及更調總

會辦則請將軍預先徑向總監工斟酌因此任關繫重要必須詳擇彼此確知爲賢能之員熟悉鐵路事宜方可委任斟酌之後仍請將軍主持派定

第九條 該總局總會辦及各官員兵勇等一切經費總監工每年繳給該總局總辦吉林市平銀六萬兩此款總監工分開交給該總辦按每三月以前繳給

第十條 此外建修局所並差人居住房屋以及局所應用器具等費由該總辦同總監工商定該總辦應用項若干向總監工支取

第十一條 以上合同應繕兩分用華俄文字吉林將軍長順與全權代辦達聶爾畫押畢仍送總監工茹格惟志副監工依格納齊烏

俞廉三致  
樞垣賠款  
湘攤七十  
萬惟有十  
稅抵補電

斯畫押然後吉林將軍存查一分總監工存查一分

俞廉三電信 新定賠款湖南派銀七十萬兩湘省礮瘠羅掘無從惟有於鹽斤再加四文川粵淮鹽一律收取所加係三省之鹽實皆湘民所出且係湘省商人出資販運仍在湘省交納非就產鹽之場竈增收自應專作湘省籌增之款土藥一項部議加抽三成應即照辦惟川黔土藥自西路沅靖一帶陸運居多奸商易於趨避惟有責成局員及各州縣會同防營協力堵截茶糖煙酒銷售不多加成無幾茲擬將百貨釐金一并酌量議加或可集成鉅款又田房稅契一項州縣託稱辦公藉資餘潤隱漏居多茲擬設法清釐以冀集成鉅款一切請旨遵行奉旨電俞廉三覽奏悉著照所請行

張之洞致  
樞垣英使  
言俄新約  
萬不可許  
如未議妥  
請各國公  
斷電

張之洞電信 前數日英使薩託自京來見密談云聞俄人新改之約仍係欲專東三省礦務工商等利顯違各國條約虧損各國利權中國若許各國必向中國索償聞俄已派人往吉林黑龍江另立礦務專約如果許之各國必與中國爲難論理各省礦務應歸朝廷主持各省將軍督撫不應擅許一國專利至此約侵奪中國自主之權如兵數及駐兵處所須商俄官華兵充巡捕不能用礮各條盡奪中國兵權中國直是無兵且此數條未言年限是中國永遠自棄兵權政權尤慮他國藉口但東三省既有去年之亂中國若不暫爲稍事遷就亦難望俄人甘心退還即普法戰後法人未清還賠款以前亦受普人種種箝制應於各條下明訂年限只可作爲暫時辦法如俄人未退兵前則兵數及駐

兵處所與俄商明巡捕兵亦暫不用礮俄兵退清後則一切悉仍舊由中國自主中國前數年既准俄人在東三省造路俄人自得以沿路駐兵保護但除保路外俄人斷不應索中國亦斷不可讓他項利權如遼河不准造橋及他處造路之類不然他國亦恐在他處效尤也總之此約萬不可照許如中國自與俄議不能得公平之約則可請英美日德法五大國公斷其事其餘小國不必請其與議又云恐中國全權大臣或不知其中詳細利害以爲此只係中俄兩國之約與各國無關倉卒即行定議實於中國大有妨礙囑洞轉爲上達朝廷等語次日來函大意略同該使之意最注重鑛路工商等利切實屢言中國若許俄人專各種之權利英日等國必怒必在各省效尤洞九月卅電十月東電兩

奏一據日電一據英電已經痛切瀝陳今薩使當面直言無忌不敢不  
以上聞至其勸我不可永棄主權必須明訂暫時年限一節尙屬持平  
至將來總以請五國公斷爲妥朝廷如以未定之約不便宣布或即不  
必明列中俄現在所議之條款祇云此事兩國意見多有不同日久未  
能議妥請各國代爲持平公斷各國即可出爲調停於俄亦尙無妨礙  
總之俄約宜詳詢妥商不可貿然遽定謹據情密陳請代奏

二十六日 駐蹕開封府城

二十七日 駐蹕開封府城

二十八日 駐蹕開封府城

懿旨李鴻章著再賜祭一壇伊子李經邁以三四品京堂候補慶親王



奕劻賞食親王雙俸大學士榮祿賞戴雙眼花翎並加太子太保銜王文韶賞戴雙眼花翎兩江總督劉坤一加太子太保銜湖廣總督張之洞直隸總督袁世凱均加太子少保銜

二十九日 駐蹕開封府城

上諭如格陳璧奏監察吏部清釐檔卷完竣並敬呈管見各摺片吏部檔卷現已清釐完竣惟其中繁複者多自應嚴加刪汰仍著如格陳璧會同吏部堂官督飭司員將實在無用者悉行焚燬其通行常用者改大冊爲小冊併分冊爲總冊分省分衙連類登記勿令破碎紛雜總期一目了然統限一年以後仍於月終年終隨時刪修所修檔冊均提存司堂以便檢閱至文選考功兩司各項官冊記載尤多龐雜著責成該

袁世凱致  
樞垣中外  
輿論甚望  
電與回京

管司員一併釐定其月選未擬選之先提前黏榜曉示既擬選之後印刷部示即不投供之教佐等官亦將扣選緣由附入敘單每月編表刻冊俾百爾咸知經此次示諭之後該部堂官等務當認真整頓實事求是毋得稍涉敷衍以肅銓政而杜弊端

十一月初一日 駐蹕開封府城

上諭朕欽奉皇太后懿旨宗人府府丞盛宣懷贊襄和議保護東南地方總稅務司赫德隨同商辦和約頗資贊助盛宣懷赫德均著賞加太子少保銜以示獎勵外人加宮保銜自此始

袁世凱電信 詳探中外輿論甚望變輿回京各新使尤立盼呈遞國書均無困我辭氣駐京水兵一千八百餘天津一帶六千餘山海關一

帶不及三千共萬餘人駐兵係公約所許勢難商撤我如按條約公法辦理交涉不露仇嫌形跡各國互有意見勢不能協以謀我縱或有一二國包藏禍心而我不犯衆怒各國互相牽制自不敢遽作戎首駐兵亦不足爲慮俄約利在延宕斷無戰事且各國兵未全撤俄必不敢北犯交還天津至速須在明春啟鑾既有定期不可再改恐生枝節惟各國深恨甘軍目爲董黨鄧馬兩軍不宜北來啟人猜防

初二日 駐蹕開封府城

上諭河南巡撫松壽陝西巡撫升允均着加恩賞加尙書銜松壽並開復革職留任處分

初三日 駐蹕開封府城

張之洞致劉坤一盛宣懷電  
加稅十八條分列詳  
定請主  
持

張之洞致劉坤一盛宣懷電信 滬省電寧卅電均悉英使議免釐加  
稅一事鄙意大綱有十八條一曰免釐不可礙我商民生計二曰免釐  
不可侵我財政之權致妨我日後籌款三曰加稅之數必足與免釐相  
抵四曰釐金外銷之數必須算入五曰各省籌款有實係內銷報部而  
不名爲釐金者必須算入六曰產地之釐不能免七曰土貨內地往來  
無關出口銷外洋者不能免八曰國家度支所抽可免地方所用州縣  
紳董所抽不能免九曰將來中國行印花稅物業稅不能阻十曰洋貨  
進口稅只可加至值百抽十五而止即少加亦可十一曰土貨出口稅  
萬不可加十二曰絲茶出口稅必須減十三曰出口鑛貨之稅必須加  
至抽十出廠鑛稅另抽五十四曰洋人在內地製造土貨只可照向章

離廠正稅出口半稅共抽七五不可加十五曰運行土貨坐賈華商掛洋旗之弊宜禁絕十六曰我內地釐金自行設法輕減裁併十七曰若產地捐不免內地來往土貨釐不免地方租不免印花稅物業稅不阻則進口洋貨抽十五出口土貨不加已足相敵而有餘十八曰總稅司雖允將增收關稅撥還各省釐金內外銷然與其多受關稅之撥補不如少留自抽之釐捐第一條注曰稅司賀璧理面告鄙人言內地往來土貨如秦運晉東運豫川運楚粵運湘江運皖閩運浙本省此府運彼府之類其釐皆免最爲無理其說以商販土貨或夾有洋貨恐仍多留難爲詞其意蓋欲洋商在內地運銷土貨從前英國約內雖有內地通商之條因阻礙甚多迄不能行今照此辦法洋商長袖善舞鐵路日通

盡奪華商之利暗中作成一偏地開放通商之局此說一行華人只能充小販充零星坐賈充洋夥再無專行厚利中國商務永無生機矣第二條注曰時勢無定關稅亦無準若各釐各捐皆免載入條約是中華全國利權專在海關稅司之手此外不許自籌一錢設有緩急竟成束手第三條注曰應免之釐內外銷約二千一二百萬可加之關稅進出口亦可約二千一二百萬第四條注曰報部釐金一千六百萬外銷必有六七百萬第五條注曰各省於釐金之外多有實係內銷報部充正用而不在報部釐金數內者或名曰捐或名曰經費有事係試辦名已報而數未報者有數係約舉未報確數者有試辦之初數少近日數多者此非釐金局所管戶部遂不歸入釐金數內計算此類各省大約亦

共有七八百萬第六條注曰產地之貨或銷內地或銷外洋無從區別此項釐金洋人不當與聞斷不可免況產地可隨便加捐無礙稅則去年二月總署咨內已聲明但恐洋人不允或設法分別此貨是否出洋以定免否第七條注曰土貨內地往來與各國商務無涉去年二月總署咨內已聲明第八條注曰外國稅章分國家稅地方稅兩種充俸餉船械國學鑄幣大工獎農勸工助商賞卹兵民外交開埠等事用者爲國家稅充本縣學校巡警修街道修隄防備荒善舉等事用者爲地方稅此本州縣所用紳董所抽者也若此項地方稅不減辦事尙不至束手惟條款內必須載明第九條注曰印花稅種類甚多有取之契券憑約貨單者與田房契稅補缺領憑有部費五貢領單有費官代書領戳

有費相類除稅契外國不能干預外其餘中國難辦有取之工商物業執照者與牙帖當舖戶門市捐廣東膏店領牌捐相類此種亦名物業稅日本名營業稅此與釐金迥然不同且皆各國所有不應阻我有此項物業稅不阻止亦尙有籌款之法惟賀璧理已微露其意將阻我收此種稅必須極力辯駁於條款內詳晰載明第十條注曰洋稅至多只可抽十五萬不宜多加多則彼不准我留種種捐款矣第十一條注曰土貨出口免稅爲富民第一義商務第一義勸工第一義交涉第一義自強第一義外國通行之善政今日即不能免萬不可加卽抽十亦不可變法學西法似須從此事變起學起第十二條注曰絲茶爲出口土貨大宗通商實在有益者莫如此兩項釐稅重極困極今印度之



茶意大利日本之絲日盛中國絲茶日衰必須大減以保固有之民業若興辦地方稅物業稅必可相抵不患款少第十三條注曰鑛產與他項土貨不同華商學問資本斷不能開非外國鉅商不可中國所得者窮民苦工開採口食之利耳故宜加至抽十五其勢必行第十四條注曰洋人製造土貨於中國有益工必取之於華則利工造廠製貨其料必取之於華則利工而並利農華工在廠日久學其技藝華商察彼銷路仿其成法將來中國可自開無數工廠則利工而並利商且此項稅萬不宜重釐稅章程華廠只能援洋廠爲例若洋廠重則華廠不得輕矣豈非爲法自困故不可加第十五條注曰洋旗旣非洋商又多土貨本非條約所有乃買辦及流氓漁利弊混耳必宜詳議查禁之法載入

條約第十六條注曰內地釐金苛擾之弊不除則此釐金全不能保即不明免亦必盡歸洋旗雖不免而無物可抽第十七條注曰今日洋稅抽十已開辦免稅洋貨已抽稅兩項至少可得二百七八十萬連原有正稅計可收洋稅九百萬內除抵向有報部子口半稅六七十萬外此兩項已增二百萬若抽十五應加兩倍共得一千八百萬連上兩項可共增二千萬已足抵報部釐金及總署咨外銷之數矣若內地土貨釐不免產地捐仍可抽地方稅可抽物業稅可抽則所免之釐不過一千數百萬加稅雖略少已足相抵而所留之四項豈止一千五百萬哉故洋貨進口稅不宜過加免其藉口禁阻我各種釐捐也第十八條注曰全國鉅款抽收之權若全操之於洋關而全省用款撥補之權又全操

之於戶部則赫德雖有甘言戶部斷不遵辦五省鹽釐撥補是其前鑒  
赫德擬撥還百萬戶部不過准六七十萬撥剩之款全令解部且所撥  
者既有定數必將竭澤求魚膠柱鼓瑟先提京款不顧外款治亂不問  
緩急不問戶部徑札關道提取誰能阻之至無款辦事請於戶部不過  
答以求節省杜中飽責虛糜等語今日裁營明日裁局後日催報銷大  
局不可爲矣故今日與其多加洋稅適爲自縛之繭不如少加洋稅留  
我自籌之地而減於抽十五亦未嘗不可果使洋人不奪我籌款之權  
即加稅不敷免釐之數似亦無難峴帥身膺重任應辦之事應用之款  
最多杏翁指日封疆亦不可不慮及也此約本爲有益各國而來只望  
其不大損我利權幸矣若欲賠款全取給於加稅恐辦不到此事應由

杏翁主持峴帥定斷鄙論不過芻蕘備采而已特通籌遠慮十分危險不敢不爲兩公盡言英馬使到鄂鄙人總只作虛活語要上等價斷不敢率然輕許令杏翁難於爭改也至行輪章程總是取便洋商吞併華商不知出何花樣請峴帥杏翁籌酌擇要電示洞覺

初四日 已刻自開封行宮啓鑾申正至新店行宮駐蹕

兩宮自河南開封行宮啟鑾各省大員多半趨集午正行抵柳園河岸少憩旋出幄設香案先祭河神祭畢卽步行登龍舟旋於舟次進膳俄而千橈並舉萬槳齊飛絕似元夜熬山一團簇錦徐徐移動也

初五日 申正至延津縣駐蹕

初六日 駐蹕延津縣

張之洞致  
樞垣及外  
部武昌船  
關不歸江  
漢關管請  
令赫德勿  
攪辦電

張之洞電信 各口常關歸稅司兼管本專指監督所管常關而言嗣以償款爲重即別衙門所管之關亦間有撥歸稅司者然亦本口之別衙門之關而已若旣非監督之關又非通商口岸之衙門所管自不應歸稅司管理乃昨據江海關道稟該關署稅務司盧力飛奉總稅司赫德札請武昌廠關歸其兼管謂係各國公使之意等語查武昌船關係武昌府管不歸江漢關監督漢口與武昌不惟隔江而且隔府更非同一口岸與稅司何涉各國公使只求償款有著何嘗爲稅司攬權連日稅司擬推廣郵政派洋員入內地各處直至河南若不及早限制中國政權利權將盡歸赫德矣况鄂省民船日形貧苦正擬將武昌關章程妥爲籌酌以示體恤若歸海關洋員辦理必多窒礙除飭關道駁覆外

務請鼎力主持飭令赫德轉飭漢口稅司不得攬辦口外衙門之關至  
禱並祈電覆之洞肅沃

初七日 行七十里抵衛輝府駐蹕

初八日 行五十里至淇縣駐蹕

初九日 宜溝驛屬淇縣駐蹕

初十日 申正抵彰德府駐蹕

十一日 駐蹕彰德府

十二日 併站前進至豐樂鎮午餽駐蹕磁州

十三日 駐蹕邯鄲縣

上諭長順等奏稱本年五月間韓警務官李敬順俞振浩等帶兵過江

擅設鄉約意欲管理越墾韓民向阻觸怒持刀逞兇八月十九日茂山城韓兵率衆渡江強刈禾稼並在對江開礮攻擊練會佃民驚避現經咨會駐韓使臣查辦等語吉林與韓國畫江爲界疆理分明以邦交而論自應各遵約束務使兵民相安何得縱令肆擾著外務部即行傳諭駐韓使臣許台身照會該國政府嚴行查禁以遏亂萌而敦睦誼

十四日 駐蹕臨洺關

上諭外務部左丞著瑞良補授右丞著顧肇新補授左參議著陳名侃補授右參議著紹昌補授

十五日 駐蹕臨洺關

十六日 駐蹕順德府

十七日 駐蹕內邱縣

上諭奕劻王文韶電奏據崧蕃電稱平羅縣屬上營子地方突有匪徒多人焚擄鄉民搶掠教堂傷及教士並教民數人已飭派隊保護並電山西巡撫分途兜拿等語各省教堂教士朝廷一視同仁疊經嚴降諭旨飭令實力保護不准稍有疏虞乃該地方官奉行不力致有戕傷教士教民情事實堪痛恨著崧蕃先將疏防營員據實嚴叅並會同岑春煊迅飭派出隊伍勒限懸賞將兇犯悉數擒拿務獲懲辦毋使漏網以肅法紀而篤邦交

十八日 駐蹕栢鄉縣

上諭奕劻等奏英美二國使臣請將張蔭桓開復等語已故戶部左侍



郎張蔭桓著加恩開復原官以昭睦誼

上諭徐會澧陳壁奏察看工藝局情形一案據周馥代奏已革侍讀學士黃思永請將京師義倉收養游民創立工藝局招股創辦等情着於京師內外城各設工藝局一所招紳籌辦由順天府督率黃思永所請廢倉招股設局著不准行

十九日 駐蹕趙州

二十日 駐蹕欒城

上諭桂春著開去右翼總兵差使

二十一日 駐蹕正定府城

上諭二十八日回宮後即恭詣各祖先殿謁告並遣官分謁各壇廟及

東西陵

上諭奉懿旨東西陵理應親謁著於來春諏吉率皇帝祇謁務應破除常格減節供億

二十二日 駐蹕正定府城

上諭朕欽奉慈禧端佑康頤昭豫莊誠壽恭欽獻崇熙皇太后懿旨國家與各友邦講信修睦榮敦聯歡現在回鑾京師各國駐京公使亟應早行覲見以篤邦交而重使事俟擇日後皇上於乾清宮覲見各國公使其各國公使夫人從前入謁宮廷極稱款洽予甚嘉之亦擬另期於寧壽宮覲見公使夫人用昭睦誼著外務部即行預備請旨定期一併恭錄照會辦理

## 二十三日 駐蹕正定府城

上諭平羅縣屬教案業經迭降諭旨嚴飭速辦茲據崧蕃續奏彭城教士復因傷斃命現已捕獲賊犯四名等語着崧蕃仍遵前旨將該教士妥爲撫卹所獲兇犯審實即行正法其餘各犯仍趕緊督飭嚴拿務獲懲治

## 二十四日 駐蹕保定府城

兩宮改由鐵路北上分乘花車於午正一刻馳抵定州在鐵路公司傳備御膳中刻抵保定府

劉坤一電信 向來借款計鎊故還時不問銀數總以還足所借鎊數及應付之息爲斷如係議定銀數即照數付銀今各國賠款約載海關

劉坤一  
致戶部  
及庫  
或賠款  
或用銀

請詳覆電

軍機處致  
各省督撫

銀四百五十兆息四釐按照表列分三十五年共還本利九百八十二兆有奇照此係應還銀數然第二條甲段又載有本息用金付給或按應還日期之市價易金付給照此似又須付金鎊故葛使照會有應按光緒二十七年二月十三日市價易金按四釐息即爲諸國償款一定總數全權照覆改爲按付款時鎊價惟既須付給金鎊每期究竟應付若干鎊數並未列表頒行且既定付鎊各國祇須照鎊收取則銀兩平色彼可不問何又約載必須關平既定平色則又係付銀是否即照約表所載平色銀兩儘數按期交付照市易鎊分還各國多寡不再過問抑係如何辦理務望詳晰電覆以憑飭遵坤養

軍機處致各省督撫電信 奉旨前據劉坤一等聯銜會奏此次賠款

賠款照約  
每期籌足  
不能再減  
三成電

軍機處致  
全權大臣

數鉅籌畫甚艱惟約計洋稅加足值百抽五並洋煙酒食一律收稅加以各處常關歸洋關徵收約共增銀四百五十萬再加本年漕折百萬統共銀五百五十萬核計按照戶部奏派賠款之數約有三成請減三成籌解等語當經照准原以年半籌還可資騰挪茲據奕劻等電奏賠款仍應按照公約每期籌撥足數自不能核減三成著各該將軍督撫等仍即照部撥定十成原數按月彙解滬道轉交銀行存儲備還不得諉延致滋口實統俟年終彙計洋常各關收數全漕折銀兩均有的確數目能否加足三成或竟均有贏餘再行核減以免貽誤樞濠

二十五日 駐蹕保定府城

軍機處致奕劻電信 頃接江督電稱向來借款計鎊不問銀數總以

據江督電  
詢賠款用  
金鎊或還  
銀請還  
江督電

還足所借鎊及應付之息爲斷如係議定銀數即照數付銀今各國賠款約載海關銀四百五十兆息四釐按照表列分三十五年共還本利九百八十二兆有奇照此係應還銀數然第二條甲段又載有本息用金付給或按應還日期之市價易金付給照此又須付金鎊故葛使照會有應按光緒二十七年二月十三日市價易金按四釐息卽爲諸國償款一定總數全權照覆改爲按付款時鎊價惟既須付給金鎊每期究竟應付若干鎊數並未列表頒行且既定付鎊各國祇須照鎊收取則銀兩平色彼可不問何又約載必須關平既定平色則又係付銀是否即照約表所載平色銀兩儘數按期交付照市易鎊分還各國多寡不再過問抑係如何辦理等語希卽向各使及赫德詢問究竟用金鎊

付給抑或即還銀款逕請詳晰電覆江督爲要樞敬

二十六日 駐蹕保定府城

上諭原任戶部尙書立山兵部尙書徐用儀吏部侍郎許景澄內閣學士聯元太常寺卿袁昶該故員等子嗣幾人有無官職着吏部迅即咨查聲覆

外部致樞垣吉林邊界韓官越疆生事案據韓廷覆俟商定詳陳電

黑龍江將軍薩保奏

外務部致樞垣電信 頃接駐韓許大臣電稱箇電謹悉奉旨吉林邊界韓官越疆生事等語前接將軍長順來文當即照會韓政府據覆將李敬順俞振浩兩人撤退俟商定後專疏詳陳乞代奏云外務部宥

二十七日 駐蹕保定府城

黑龍江將軍薩保奏爲黑龍江省俄人布置鐵路前後不同與奴才現

俄人布置  
鐵路前後  
不同並籌  
辦情形摺

在勉力支撐及現在籌辦情形恭摺具陳仰祈聖鑒事竊於光緒二十七年正月二十七日由摺差賁回上年八月初九日拜發原摺恭奉硃批俄人尙無久據之意已派增祺辦理接收事宜並飭奴才仍勉籌措柱力維大局等因欽此奴才跪誦之下悚惶莫名奴才敢不勉力支撐以盡犬馬微忱謹將俄人鐵路布置與現在情形敬爲我皇太后皇上陳之當未經戰事之前江省無鐵路地方從無俄兵攙雜其工程自呼倫貝爾西北界起至松花江北岸止共分八段東西將二千里每段僅駐俄兵二三十名至百名不等領兵大酋不過二三人卽毘連江界之哈爾濱全工所萃亦僅俄兵數百名而今則異矣除哈爾濱外凡江界鐵路駐兵地方與兵數均較多於前卽無鐵路之處亦多擇地扼紮



省城管兵各官外又有統轄各駐之總管理案之刑官辦交涉之廓米薩爾及電報官管地面之格必丹常駐兵約千名左右更調自南吉界之茂興站起直北至黑龍江上計在墨爾根布特哈各界均駐格必丹電報官四起各帶兵數十名西路自呼倫貝爾至省有似統領者一員四五起共駐兵約千人東路呼蘭城與巴彥蘇綏化兩廳均有駐紮移調不常官兵之數雖較西路略少但另有大隊往來其間電報尙未設通華人遠行均須廓米薩爾給照始無阻攔此俄人現在星羅棋布較先大相懸遠之情形也溯自去秋以來俄國官兵與本地旗民共相雜處奴才深慮喧賓奪主於閏八月在省城設立交涉處與通省地方互相呼應蓋彼族官有文武不等兵有駐紮與保護鐵道之別辨認不

易言語不通易起猜疑加以舌人難得精良而略曉俄語棍徒乘俄搜查鎗械之際勾串兇擾民不堪命衝要地方更屬任意恣橫各處每遇交涉我既官民交困彼亦皂白不分彼此苦之奴才籌思非羅致精於西學之才不能主客相安因思從前江省鐵路以第六段最爲安靜蓋得力於繙譯官分省試用縣丞朱堯佐宅心正大適該員於去冬回江奴才因與俄官商定凡有要事均令朱堯佐繙譯鐵路諸事悉仍其舊以免偏廢該員亦深明大義力維其艱於是俄兵漸循規矩俄匪斂迹華棍可免放手拿辦閭閻生趣日增商市大半復業屯堡亦多耕作雖未遽復舊規而愁慘蕭條之象大半去矣當俄兵臨城之際匪徒乘亂搶劫全賴協領全福制兵千名巡城鎮壓否則不堪設想嗣後奴才即

將該制兵分紮省城及要緊處所並於墨爾根布特哈城界擇要緝匪預爲俄兵忽退伏莽猝起之備旋獲刼案多起從嚴懲辦行旅較暢呼倫貝爾往年即來另撥駐紮悉仍其舊黑龍江城廬舍蕩然旗民鬻聚省垣已籌賑撫另摺陳明呼蘭等處前則文報隔絕近來信息漸通爲財賦之區所關尤重非僱兵二千不足鎮攝奴才已商倭克金泰揆度情形酌量辦理就地籌餉暫資展布然各城兵餉及一切善後之費爲數不資均無所出奴才夙夜焦思束手無策欲指釐木兩稅大亂之後恐成弩末惟漠河觀音山各金廠久著成效因亂歇閉倘能接續開辦並都魯河金鑛亦歸該廠續開江省可借報効之數歸公動用擬請旨飭下北洋大臣速派妥員措資前來接辦庶利權不失俄人現在屢來

照會尋鑛陋苗江省無力籌款若不由北洋速辦俄必垂涎此外則蒙荒旺湯旺河之荒亦擬酌減荒價招民承領以廣招徠江省除此鑛務荒務外別無生財之方卽無自立之策惟現在各城官兵均指省城接濟而省城亦苦一籌莫展自顧不暇擬請借貸洋款三十萬兩暫資展布是否可行未敢擅便擬俟新任將軍綽哈布到任後會商辦理及一切應行查明具奏之案會銜奏陳所有俄人布置前後不同奴才勉力支撐情形謹先恭摺具奏伏乞皇太后皇上聖鑒訓示再於繕摺尙未拜發敬於三月初四日由摺差齎回上年閏八月十九日拜發原摺一分並上年十一月初四日原摺一分恭奉硃批黑龍江將軍已簡放綽哈布令迅速赴任矣同日又奉硃批現在東三省俄人已許交還新授

將軍綽哈布不日抵省著仍竭力維持飭俟綽哈布到任後會同妥籌整理等因欽此奴才跪誦之下謹遵聖旨合併陳明謹奏

## 二十八日 回京

十點二十五分自保定啟鑾鐵路局特備花車一列十二點抵馬家堡車站稍停兩宮下車御黃轎入永定門未正五十分入乾清宮從官儀仗以次散隊規後歸來城郭依然人民如舊兩宮此際不知作何感想耶

## 西巡大事記卷十一終

## 西巡大事記跋

清光緒辛丑先公自西安扈蹕還京以此書授亮而詔之曰是編雖在途次倉卒綴述顧見聞較確皆據事直書者余欲後人知所懲懲也故錄存以備考自今以往開民智厚民生其急務矣亮受而識之不敢忘茲距先公之歿垂二十九年始克以是編付梓回憶拳匪之起初不過二三僉壬鹵莽滅裂焚惑宸聰思洩憤於一時視邦交如兒戲乃至師燬國辱禍釀燎原迹其鑄錯之由皆因教育無聞民智閉塞神怪誕妄之說深入人心加以平日政治不良游惰者衆一旦有事則此等恣睢暴戾之輩乘機蠢動結黨橫行適有提倡之人遂一發而不可收拾卒致聯軍壓境家破國危九廟震驚兩宮出狩厥後雖懲治禍首和議告

成而賠償鉅款元氣大傷又復戍兵據我險要主權失矣利權奪矣凡有設施咸受牽制此民困所以益深民憤所以益甚清室卒因之而速亡即今日之外患憑陵生民憔悴亦肇端於庚子之役此誠可爲痛哭流涕者也然則中國其將不振乎曰否否昔土木之變英宗北狩而猶能保有明之統一德意志敗於協約各邦割地請成而猶能稱歐洲之盟主今我中國幅員之廣既視明代有加而人民土地又十倍於德國果能上下一心急起直追以智力文化競爭於自存之域以深籌密慮注重於建設之途同人民好惡之心行天下爲公之訓則任何嚴重之外患祇增我一時之痛苦不能礙我強國之大計西儒伯倫知理曰民人之意志卽國家之精神吾願爲國人者毋怵惕於大局之阡危毋悵

怯於強鄰之壓迫充我志願之所期盡我智慧之能及則危者何不可  
復安亡者何不可復存胥視吾人之努力爲何如耳然則先公所謂開  
民智厚民生者必人民端其志意政治循其軌道而後可以轉貧爲富  
轉弱爲強烏乎此豈僅爲拳禍言之又豈僅爲吾國言之哉

中華民國二十有二年六月 男亮謹識





# 西巡大事記勘誤表

卷數	頁數	行數	誤	正
首	序一	一七六	對於	於對
首	序一	一七	況義	且義
首	序二	四	止渴	毒虎
首	序二	三	紹縣	紹興
首	四	三	同治十年	光緒十三年
首	五	廿	國民	拳民
首	廿	二〇	二月	二日
首	廿七	三〇	重建	重達
首	廿七	七	里亞	尼亞
卷數	頁數	行數	誤	正
一	四六	三	端洵	瑞洵
二	錄二	四	五日	六日
二	錄二	一七	六日	七日
三	錄二	六	初三	初二
四	一三	一六	奉天	盛京
六	錄二	一五	停調	調停
六	四	一四	等各	等與各
七	一〇	三	聲係	聲明係
八	錄一	六五	初六	初七

# 西巡大事記勘誤表

一

附刊之一

八	八	八	八	八	九	一〇
錄目一	錄目二	錄目二	錄目二	錄目二	錄目三	錄目三
二〇	九	一〇	一六	一四	一五	一九
李鴻章	十八	飭轉向	爲不合	辦襄	臣呂	通譯日本領
奕劻李	十九	飭向	爲合	襄辦	臣據呂	通日本總領